

**Акафист Пресвятой Богородице
перед Ея иконой,
именуемой Табынская**

Акафист Пресвятой Богородице перед Ее иконой, именуемой Табынская

Кондак 1

Взбранной Воеводе рода христианскаго и страны нашея известной Избавительнице, хвалебныя песни принесем вернии Деве Владычице Богородице. Ты же яко имущая милосердие неизреченное, от всяких нас скорбных обстояний свободи, да с любовью зовем Ти:

Радуйся, Похвало Табынская и всего мира Надеждо и Утешение.

Икос 1

Архангели и Ангели дивятся Твоему неизреченному милосердию к роду человеческому, Дево Богородице, яко благоволила явити святую икону Свою близ града Казани, егда нечестивии воздвигоша брань на мирныя люди, разоряя грады и веси их. Ты же, Благая, хотя утешити рабов Твоих пришествием Своим, скорбь их на радость преложила еси, сего ради вопием Ти таковая:

Радуйся, Благословенная в женах;

радуйся, обретшая Благодать у Бога.

Радуйся, десницею Создателя Благословенная;

радуйся, Духом Святым освященная.

Радуйся, Мати Христа Бога нашего;

радуйся, в Рождестве и по Рождестве Дево.

Радуйся, ангельских чинов удивление;

радуйся, святых немолчное прославление.

Радуйся, Похвало Табынская и всего мира Надеждо и Утешение.

Кондак 2

Провидящи, Мати и Дево, беды и смятения окрест града Казани, явила еси святую икону Свою, наипаче же милость Свою, Владычице, людем, да не оскудеет вера, да не угаснет надежда, но да прославляется Имя святое Отца и Сына и Святаго Духа вопиющими: Аллилуиа.

Икос 2

По времени образ Твой честный Казанский во мнозех градах и весех страны нашея, на дсках изображенный, прояви силу благодатную, истекающую чудотворениями, тако и окрест веси Табынския близ Вознесенския обители святыя, явися новый образ Твой: некогда диакон чернец, грядый из веси во святую обитель, услыша Твой глас: Да потщится правоверная братия богоспасаемая обители прияти Мя в храм Господа Моего. Убояся прельщения, не внят неземному гласу сему. Возвращахуся же путем тем, паки услыша глас Твой: Прииди и виждь. Уразумев, яко глаголы сии свыше суть, прииде на место, откуда слышен бысть глас сей и, узрев святую икону Божию Матере, на камени велием близ горы Табынския у источника воднаго, возрадовася духом. Мы же, дивящеся сему, вопием Ти сице:

Радуйся, явлением святыя иконы Твоея милость Божию нам возвестившая;

радуйся, чистым сердцем глас Твой святыи явившая.

Радуйся, Мати щедрот и милосердия;

радуйся, милости сокровище многоценное.

Радуйся, с небесных высот на рабы Твоя призирающая;

радуйся, покровом Твоим нас осеняющая.

Радуйся, яко милость Твоя посещает христианские веси и грады;

радуйся, яко милосердие Твое сердец наших отрада.

Радуйся, Похвало Табынская и всего мира Надеждо и Утешение.

Кондак 3

Била благодати Твоея осени диакона благочестиваго, вневгда узрети ему святую икону Твою, Владычице, и объят быв страхом величия Твоего, возрадовася зело, со тщанием востече во обитель и возвести братии о дивном обретении своем, радостно вопия Богу: Аллилуиа.

Икос 3

Имущи, Пресвятая Дево, икона Твоя силу благодатную, явися иноком радостию велиею, егда познаша милости Твоя чрез икону Твою Табынскую людем являемья, со страхом несоша святыню сию во обитель свою и поведоша о сем воеводе Уфимскому и архиерею града Казани. Мы же благодарнии вопием Пресвятей Деве таковая:

Радуйся, помощь Свою всем притекающим к Тебе подающая;

радуйся, слез наших не отвергающая.

Радуйся, к Сыну Твоему моление о верных выну приносящая;

радуйся, прошения наша во благо исполняющая.

Радуйся, монашествующих покрове;

радуйся, девствующих ограждение.

Радуйся, к Богу ума и сердце направление;

радуйся, душ наших спасение.

Радуйся, Похвало Табынская и всего мира Надеждо и Утешение.

Кондак 4

Буря крамолы воздвигнутыя от мятежников, наважденных Айдаром и Кусюмою, разори обитель Вознесенскую, братию же избивши, разсеятися понуди. Ты же Всеблагая, хотящи по времени явитися во славе велией, сокры икону Свою чудотворную Табынскую. Мы же, дивящися таковому промыслению Твоему, Владычице, вопием к Богу: Аллилуиа.

Икос 4

Глышаци Богомати стенания рабов Своих веси Табынския и видяще скорбь их, зане вера Христова поругаема бысть от неверных, в познание истины Христовыя и изобличение неверных благоволила еси паки второе явити на камене Образ честный, светом Божественным озаренный. Мы же, дивящися таковому Твоему попечению о нас, вопием Ти сице:

Радуйся, явление иконы Твоя Табынския свет истинныя веры земли Уфимстей даровавшая;

радуйся, суеверием и зловерием омраченных просвещение.

Радуйся, грешных исправление;

радуйся, кающихся с Богом примирение.

Радуйся, милость согрешившим являющая;

радуйся, раны греховныя истребляющая.

Радуйся, скорбная сердца надеждою возрождающая;

радуйся, любовью их согревающая.

Радуйся, Похвало Табынская и всего мира Надеждо и Утешение.

Кондак 5

Боготечную звезду, святую икону Твою увидеша нечестивии агаряне, светящуюся на камени, но не уразумеша Твоего, Владычице, пришествия: косни бо сердцем беша, ненавистию ко христианом распалишася, надругашася над святынею и за таковое хуление святыни Твоя слепотою наказани быша, блуждаху по лесу, не ведуще пети: Аллилуиа.

Икос 5

Видеша хулители Святыни, яко зело наказани быша от Бога, не хотяху раскаятися, зане ожесточении сердцем беша. Токмо един от них, лучем благодати Божией просвещенный, раскаяся и, абие прозрев, возвратися со единоплеменники своими ко святей иконе и слезно моляшеся пред нею. По молитве его Мати Божия всех исцели, сего ради вопием Пречистой:

Радуйся, торжество веры в стране нашей являющая;
радуйся, святой иконою Твоею окамененныя сердца смягчающая.

Радуйся, зловерия явное обличение;
радуйся, истинныя веры утверждение.

Радуйся, рода христианскаго возвышение;
радуйся, Святыни присное ограждение.

Радуйся, яко Тобою беззаконие наказуется;
радуйся, яко Тобою хула на Бога истребляется.

Радуйся, Похвало Табынская и всего мира Надеждо и утешение.

Кондак 6

Проповедницы Твоя благодати явишася прозревшии Магометане, возвестиша христианом веси Табынския о Твоем, Богомати, явлении, но не прияша крещения, токмо первый прозревший, иже прияв веру православную, возрдовася зело и рече всем притекающим ко источнику целебному: се, ныне познах, яко велий есть Бог земли Российския, со умилением вопия Ему: Аллилуиа.

Икос 6

Возсия свет Божественный, Владычице, егда святая икона Твоя с честью велиею перенесена бысть от места явления Своего в весь Табынскую, изливающи верным дары целебныя и всем подающи помощь и утешение с верою к Тебе во всякой скорби притекающим и вопиющим таковая:

Радуйся, отчаявшихся прибежище;

радуйся скорбящих слышание.

Радуйся, печальных утешение;

радуйся, христианом отрада и ограждение.

Радуйся, в бедах и печалех теплое заступление;

радуйся, яко немощным даруеши укрепление.

Радуйся, скорбь нашу на радость претворяющая;

радуйся, наветы вражия от нас отгоняющая.

Радуйся, Похвало Табынская и всего мира Надеждо и Утешение.

Кондак 7

Хотяще вернии веси Табынския выну памятовати о чудеснем явлении иконы Твоея, Владычице, сотвориша в честь дивныя Твоея иконы Табынския празднование в пяток девятый по Пасце, в день втораго явления Ея, благодаряще Заступницу усердно, Богу же воспевающе: Аллилуиа.

Икос 7

Новое чудо явила еси Богородице, егда за беззакония людей праведный гнев Божий постиже град Стерлитамак, поразив их болезнию холерною. Вернии же, с благословения архиерея Иоанникия, взявше святую икону Твою, Богомати, Табынскую, принесоша ю в свой град и слезно пред нею моляхуся. Егда совершено бысть молебное пение - болезнь смертная остави град. Видяще же людие милость Твою, Богородице, возопиша Тебе таковая:

Радуйся, за люди согрешившия присно пред Сыном Твоим и Богом ходатайствующая;

радуйся, праведный гнев Божий, на них движимый, на милость преклоняющая.

Радуйся, прекращением холеры благодатную силу иконы Твоея нам возвестившая;

радуйся, милость Божию и согрешившим явившая.

Радуйся, надеждо ненадежных;

радуйся, опора немощных.

Радуйся, заблуждших на путь покаяния наставляющая;
радуйся, веру в жизнь будущего века в них
пробуждающая.

Радуйся, Похвало Табынская и всего мира Надеждо и
Утешение.

Кондак 8

Странное чудо зрим о Тебе, Богомати, егда икона Твоя
Табынская принесена бысть во град Оренбург во время
мора смертнаго, и токмо явися во граде сем святая икона Твоя
- абие мор преста. Сего ради вернии града сего на коегождо
лето, ко дню Рождества Пресвятыя Богородицы, с радостию
велиею среташа святую икону Твою Табынскую, со
умилением вопиюще: Аллилуиа.

Икос 8

Весь аз, недостойный, грехми исполнихся, мирскому
вразсеянию вдахся и о душе своей вознерадех, обаче на
святую икону Твою, Владычице, взирая и просвещение от нея
безчисленным людем zde приходящим видя, паки на путь
спасения устремляюся, и в радости сердца воспеваю Ти сие:

Радуйся, шествовати путем Господним нас научающая;
радуйся, на пути ко Господу нас укрепляющая.

Радуйся, жестокосердия искоренение;
радуйся, милосердия в сердцах насаждение.

Радуйся, к подвигу целомудрия нас призывающая;
радуйся, непорочных венчающая.

Радуйся, от земнаго богатства души верных
отвращающая;

радуйся, духовными дарованиями молящихся
обогащающая.

Радуйся, Похвало Табынская и всего мира Надеждо и
Утешение.

Кондак 9

Вси людие земли Уфимския, егда праведный гнев Божий наказа их бездождем, со слезами молиша Заступницу христианскую испросити у Сына Своего и Бога, да оросит землю их дождем, и егда вернии веси Архангельския, взявше святую икону Табынскую, несяху ю на села своя, бысть дождь велий на радость скорбящим и во утешение плачущим, да воспоют Господу: Аллилуиа.

Икос 9

Витий глаголы не довлеют ко изглаголанию чудес Твоих, Владычице Неба, яко во утешение жителем Стерлитамака, низпослав свыше дождь велий на землю, сим избавила еси град их от глада и запаления огненнаго, яко да истребится от лица скорбящих всякая печаль и всякая болезнь, сего ради вопием Ти:

Радуйся, обуреваемых тихое пристанище;

радуйся, источнице милостей Господних.

Радуйся, унылых ободряющая;

радуйся, моление скорбящих ко Господу возносящая.

Радуйся, ходатайством Твоим от зноя и жажды нас спасающая;

радуйся, молитвами Твоими от запаления огненнаго избавляющая.

Радуйся, алчущих питающая;

радуйся, яко во мразех сущих согревающая.

Радуйся, Похвало Табынская и всего мира Надеждо и Утешение.

Кондак 10

Спасти хотящи, Пресвятая Богородице, страждущаго трясовицею Василия воина от града Оренбурга, исцеление подала еси ему чрез икону Свою Табынскую. Сей

воин во сне двукраты в весь Табынскую идяше и тамо Матерь Божию об исцелении умоляше. Уразумев же в сониях волю Владычицы, поиде немощный двести тридесять поприщ, труждаяся и множицею на землю падаху. Пришедъ же в весь Табынскую, егда погрузися во источник святой, идеже икона Твоя явися, абие исцелен бысть и радуяся, благодаряще Матерь Божию, возопи ко Господу: Аллилуиа.

Икос 10

Стена нерушимая веры явилася еси, Богородице, Боголюбивому отроку, имевшему части некия от камене, на нем же явися икона Твоя, Владычице. Многим болящим помощь подала еси, егда сии омывше частицы камене водою, пияху ю и омываху ею раны своя и абие исцеление приимаше. Мы же благодать Твою видяще, зане и камени силу чудотворити даровала еси, вопием Ти сице:

Радуйся, сланные ключи целебною водою прославившая;
радуйся, даже камени, на нем же явися святая икона Твоя Табынская, благодатную силу даровавшая.

Радуйся, всем с верою притекающим к цельбоносней иконе Твоей исцеление подающая;

радуйся, благодарение их ко Господу возносящая.

Радуйся, яко к помощи Твоей и маловернии притекают;
радуйся, яко по повелению Твоему и расслабленнии со ода болезни возстают.

Радуйся, бесов изгнание;

радуйся, помраченных умов просветление.

Радуйся, Похвало Табынская и всего мира Надеждо и Утешение.

Кондак 11

Пение хвалебное возсылаху Тебе, Матери Божией, вси людие, стоявшии во храме Твоем, видевши покаяние согрешившаго и милосердие Твое к нему: некий воин Гавриил за нарушение обета, данного Тебе, в расслаблении

сый исцелен бысть, егда святаго таинства елеосвящения сподобися и убо к чудотворному образу Твоему припаде. Мы же, грешнии, многажды Господа грехми своими прогневающии, молим Тя, и нам прощение грехов испроси со упованием поющим: Аллилуиа.

Икос 11

Свет очесем даровала еси, Владычице, старице некоей, осмь лет во граде Оренбурге слепотою страдавшей; егда в сретение иконы Твоея идущи, сродницею оставлена бысть стеснения ради народа, внезапно прозре и, видяще икону Твою святую, возрадовася зело. Мы же со трепетом вопием Ти сице:

Радуйся, благодатная врачевания обильно источающая;
радуйся, исцелением недугов притекающих к Тебе
веселящая.

Радуйся, слепых прозрение;

радуйся, глухих слышание, немых глаголение.

Радуйся, хромых хождение;

радуйся, вдов и сирот заступление.

Радуйся, душ наших освящение;

радуйся, земнородных упование.

Радуйся, Похвало Табынская и всего мира Надеждо и Утешение.

Кондак 12

Благодать Твою яви нам, Пресвятая Дево, молящимся Тебе пред честною иконою Твоею Табынскою, излей щедроты Твоя на грады и веси не токмо края Приуральскаго, но и во всем мире честный образ Твой почитающим и поющим Богу: Аллилуиа.

Икос 12

Поюще Твоя чудеса от иконы Твоея Табынския явленныя, молим Тя, Владычице, Лица Твоего от страны нашея не отврати и всем приходящим к чудотворному образу Твоему и милости от Тебя ожидающим во благая вся прошения исполни, да вси воспоем Ти сице:

Радуйся, иконою Твоею Благословение Божие краю нашему приносящая;

радуйся, источник Твой яко проповедник спасения веси Табынстей оставившая.

Радуйся, смиренных сердцем боговедением просвещающая;

радуйся, славу Божию воспевати нас научающая.

Радуйся, к Тебе же и падшие в покаянии притекают;


радуйся, яко призывающие имя Твое святое от падения греховнаго восстают.

Радуйся, в час смертный чтущих Тя не оставляющая;

радуйся, и по смерти во обители небесныя души их сопровождающая.


Радуйся, Похвало Табынская и всего мира Надеждо и Утешение.

Кондак 13

 Всепетая Мати Христа Бога нашего, прими молитвы раб Твоих и мир испроси всем, с верою и любовью притекающим к иконе Твоей Табынстей, и живот вечный даруй им, со умилением поющим: Аллилуиа.

Этот кондак читается трижды, затем Икос 1 и Кондак 1.

Молитва Пресвятой Богородице перед Ея иконой, именуемой “Табынская”

 Пресвятая Владычице Богородице, Мати Господа нашего Иисуса Христа, непрестанная о нас пред Богом молитвеннице и ходатаице! О, Мати наша Преблагая, всех нас при кресте Сына Твоего усыновившая. Благодарим Тя, безчисленная блага молитвою Своею нам испросившая. Благодарим Тя, множество икон Твоих чудотворных стране нашей даровавшая. Благодарим Тя, дивную икону Табынскую в годину скорбей краю Уральскому пославшая, на камени велием икону Свою нам явившая. Молим Тя, окамененная сердца наша росю молитв Твоих умягчи. Милость Свою нам показавшая у источника воднаго, идеже болезни наша телесныя исцеляются, даруй нам потоки скорбных слез и очисти ими тину грехов наших. У источника сланаго иконою Твоею благословение месту сему показавшая, помози нам слово Господа Сына Твоего исполнити и солию земли быти. Лик Свой темный нам грешным, омраченным грехом явившая, просвети тьму нашу душевную, освяти пути жизни нашея и приведи нас к тихому пристанищу в вечныя обители, уготованныя Господом любящим Его. Аминь.

Тропарь, глас 4

Наста днесь пресветлый праздник, Пречистая Дево, /
честныя Твоя Табынския иконы, Владычице, /
яже паче лучей солнечных возсия от Источника приснотекущаго, /
Христа, Бога нашего, /
источаеши целебныя дары / с верою к Тебе притекающим, /
Тя бо Христос помощницу людям Своим дарова, /
покрывати и спасати от всякия беды рабы Своя, // Едину Благословенную.